

DISSERTATIO INAUGURALIS
DE
**MODERATIONE INCVLPTAE
TVTE LAE**

AD
ORATIONEM CICERONIS
MILONIANAM
ILLVSTRIS ICTORVM ORDINIS AVCTORITATE
PRAESIDE
IOS. LVD. ERN. PÜTTMANN

I. V. D. INST. PROF. ORD. ET COLLEG. ICTOR. ASSESSORE

VT ADITVM

AD

SVMMOS VTRIVSQVE IVRIS HONORES

SIBI APERIRET

A. D. XXVI. IVNII MDCCCLXXXIII.

H. L. Q. C.

AD DISCEPTANDVM PROPOSITA

A

CAROLO FRIDERICO MEYERO

ADV. SAX. IMMATR.

LIPSIAE
LITTERIS SOMMERIANIS.

1. THE FIRST PART OF THE

THE SECOND PART OF THE

THE THIRD PART OF THE

THE FOURTH PART OF THE

THE FIFTH PART OF THE

THE SIXTH PART OF THE

PERILLVSTRI

ATQVE

GENEROSISSIMO DOMINO

DOMINO

IOANNI IACOBO

LIBERO BARONI

DE VCKERMANN

EQVITI THVRINGO, DYNASTAE

IN WEESENSTEIN, MEYSEGAST ET BENDELEBEN.

rel.

P A T R O N O

S V M M O O P E R E C O L E N D O

S A C R V M

**PERILLVSTRIS ATQVE GENEROSISSIME
DOMINE,**

PATRONE SVMMO OPERE COLENDE,



*Q*uod non nisi felicissimis contingit hominibus, ut cum splendore natalium parem animi magnitudinem, indolem rectam, ingenium perspicax, summum in litteras amorem, eaque, virum magnum quae faciunt, omnia felici fodere coniungant, id TIBI, PERILLVSTRIS ac GENEROSISSIME DOMINE, quam cui maxime, obtigisse, omnes, qui Te norunt, uno ore confitentur. Quid igitur mirum, si fretus insigni illo planeque singulari favore, quo cum fratrem meum, tum etiam me ipsum dignatus es, cuiusque memoriam saepissime maxima cum voluptate recolere soleo,

A 30

TE

TE inprimis mihi patronum optare, libellumque hunc academicum TIBI dicando studia mea TIBI probari, quam qui maxime, cupiam? Accipe igitur serena fronte atque propitia has, quas TIBI summa animi pietate ac reuerentia sacras facio, plagulas, votique mei TIBI inprimis placendi me, quaeso, participem redde. Dignum sane singulari TVA feceris humanitate, dignum TVO erga litteras amore, si me meaque studia in TVAM fidem patrociniumque receperis. Quod ut facias, TE etiam atque etiam rogo, simulque pro TVA salute perpetuaque felicitate ardentissima vota facio. Vale, porroque cuni mihi, tum litteris, quod facis, faue. Sc. Lipsiae a. d. XXV. Iun. MDCCLXXXIII.

TIBI

PERILLVSTRIS ATQVE
GENEROSISSIME DOMINE

addictissimus

CAROLVS FRIDERICVS MEYERVS

DISSERTATIO

DE MODERATIONE INCULPATAE TUTELAE, AD OR. CIC. MILONIANAM

INSTITVTI RATIO.

Saepe miratus sum, qui factum sit, vt cum M. TVLLII CICERO-
NIS, quam pro T. ANNIO MILONE habuit, oratio vnanimi
omnium, qui de his rebus iudicare possunt, consensu praestan-
tissima nobilissimaque habeatur, nihilominus contra MILONEM
iudicatum, ipsique aqua et igni interdictum fuerit. Ast mirari
desii, postquam hanc causam penitus inspicere et rem ipsam,
vti gesta est, cum iis, quae a CICERONE pro MILONE dicta scrip-
taeque sunt, accuratius contendere coepi. Quod cum a nemi-
ne, quantum quidem scio, adhuc factum sit*), et haec ipsa quae-
stio in re maximi versetur momenti, haud inanem, spero, labo-
rem suscipiam, si totam hanc causam lectoribus paulo clarius
ante oculos ponere, simulque hocce exemplo capiti illi discipli-

nae

a) Notis hanc Or. illustrerunt IAN. FARRHASIVS, IAC. CRVQVIVS
aliique, in I. A. FABRICII *Bibl. lat. Tom. I. p. 163. edit. Ernest.* no-
minati. PAVL. MANVTII *Commentar. in M. Tullii Ciceronis Orationes*
cura Conf. C. G. RICHTERI hoc ipso anno prodiit, vbi p. 834. sq.
MANVTII notae in Milonianam leguntur. Extat etiam FRANC. SYL-
VII in *Or. pro Mil. lucubratio in Pars. II. lucubration. in M. Tullii Cic.*
orationes aliquot Franc. Syluii, Phil. Melanchthonis et aliorum (Basileae 1536.) p. 334. CIC. Or. pro Mil. illustr. a C. A. HEYMANNO cum
interpr. germ. prod. Hamb. 1773. Iustum super iustitia iudicii Milonia-
ni iudicium apud nullum inueni.

nae criminalis de moderatione inculpatae tutelae^{b)} nonnihil lucis accendere studeam. Neque profecto vereor, ne quis me reprehendat, quod orationem aliquam CICERONIS in cathedram iuridicam proferens de re a foro aliena disputem, quippe qui scio, non modo haud deesse exempla virorum doctissimorum, qui itidem super oratione aliquam VILLII e cathedra iuridica disputarent^{c)}, sed rem etiam ad disceptandum propositam ita comparatam esse, ut non modo Ictis, sed omnibus omnino ciuibus hominibusque, quorum rectio ab iniusto aggressore tutus est, quorumque adeo quilibet in necessitatem, vitam, si fieri aliter nequeat, cum iniusti etiam aggressoris internecone defendendi venire potest, scitu quam maxime necessaria sit. Exemplum hoc ipso anno in Anglia praebuit DAN. MACGENNES, medicinae doctor, quippe qui, ut in litteris publicis legimus, occiso hospite suo, HARRISIO, etsi exceptione caedis necessariae usus erat, eamque in rem probabilia nonnulla protulerat argumenta, nihilominus nefariae caedis reus iudicatus et ad mortem damnatus est. Bene autem LEYSER *Spec. 600. med. 46. Oratio Ciceronis pro Milone perfectissimum est defensionis ex capite inculpatae tutelae exemplum. Si tui aduocato defensio rei, de homicidio accusati ac moderationem inculpatae tutelae obtinentis, contingit, huic ego, ut Ciceronis Or. pro Mil. legat et argumenta, quibus Cicero utitur, suam in orationem scriptumue apte transferat, auctor sum. Nihil in hoc genere exstat*

b) Ita scilicet dicitur in l. 1. C. unde vi, moderamen autem in cap. 18. X. de homicid.

c) Quo pertinent 10. LVZAC *Obs. apologet. pro Ictis Rom. ad locum Cic. in Or. pro Murena cap. 11-13. L. B. 1768. H. C. CRAS, Specimen iurisprudentiae Ciceronianae, s. Ciceronem iustam pro Caecina causam dixisse, L. B. 1769. WALWYK diss. ad Cic. Or. pro Archia, L. B. 1776. Similiter W. A. K. van CITTERS scripsit Spec. iurid. ad Iul. Capitolini cap. X. M. Ammonin. Philosoph. ib. 1776.*

exstat melius. Agitur, si praemissis necessariis tutelae inculpatae attributis, quae demum de re, quaque iudicii forma, in causa Miloniana quaesitum fuerit, quem exitum res habuerit, et denique, iure an iniuria nullo damnatus sit, inuestigemus.

CAP. V. T. I.

De moderatione inculpatae tutelae generatim.

Inculcata, quam vulgo vocant, tutela est ius omnibus hominibus competens, vitae, corporis integritatem, pudicitiam, bonaque sua contra iniustum aggressorem, et quidem, si fieri aliter nequeat, cum huius etiam intereptione, vindicandi, vimque iniustam iusta vi, non ultionis, sed defensionis causa, ex continenti repellendi^d). Praeclare CICERO pro Mil. cap. 4. *Est igitur haec non scripta, sed nata lex: quam non didicimus, accepimus, legimus, verum ex natura ipsa arripimus, hausimus, expressimus: ad quam non docti, sed facti, non instituti, sed imbuti sumus: ut, si vita nostra in aliquarum insidias, si in vim, si in tela aut latronum, aut inimicorum incidisset, omnis honesta ratio esset expediendae salutis. Nec aliter FLORENTINVS in l. 3. D. de I. et l. Iure hoc evenit, ut, quod quisque ob tutelam corporis sui fecerit, iure fecisse existimetur, et PAVLVS in l. 45. §. 4. D. ad Leg. Aquil. Qui, cum aliter tueri se non possunt, damni culpam dederint, innoxii sunt. Vim enim vi defendere omnes leges omniaque iura permittunt^e). Nec hoc ius, vitam corpusque contra vim iniustam defendendi, humani generis proprium, sed omnium animalium, quae in terra, quae in mari nascun-*

d) Aut, si manus, ipsa defensio eum in finem suscepta atque exercita.
HARMENOPVLVS PR. 6. 17. Ο τὸν ἐπὶ ἐκείνῳ φονεύοντα, ἐν ᾧ περὶ
ἐκείνου ἐκινδυνεύει, ἀντιδρῶν ἐξουί. Qui aggressorem occidit, ubi de vita
periclitabatur, insons est.

nascuntur, aerium quoque commune est. Pertinet enim ad prima illa naturae (τα πρῶτα κατὰ φύσιν), seu ius illud, quod natura omnia animalia docuit, ut vitam ament et in statu suo perflere cupiant, ideoque vim atque iniuriam propulsent⁵⁾, quae de re qui plura legere voluerit, is G. KORTIUM, C. F. HOMMELIUM et I. G. WALTHERUM⁶⁾ adeat. Ad caedem stupratoris violenti quod attinet, haud quidem defuere, qui iustitiam eius in dubium vocarent. Sed dudum haec causa ab aliis adeo perorata est, ut denovo hanc litem contestari plane superuacaneum esset. Memorabile caedis pro seruanda pudicitia peractae exemplum habet cic. pro Mil. cap. 4. Pudicitiam cum eriperet militi tribunus militaris in exercitu C. Marci, propinquus eius imperatoris interfectus ab eo est, cui vim offerebat. Facere enim probus adolescens periculose, quam perpeti turpiter maluit. Atque hunc ille vir summus scelere solum periculo liberauit; et hanc ipsam ob causam haud iniuria reprehenditur LYCRETIA, quod scilicet non vim ipsi inferentem S. TARQUINIUM, sed se ipsam, et quidem stupro demum peracto, culro occiderit, adeo ut haud male nonnemo hocce in eam epigrammate luserit:

*Si sibi forte fuit, Lucretia, gravis adulter,
Imperiosa ex meritis praemia caede peris,*

Sin

5) Atque hinc eleganter Q. MYCIVS, quaesitus, an actioni de pauperie locus sit, si duo boues commississent et alter alterum occidisset, distinguit, ut si quidem is perisset, qui aggressus esset, cessaret, sin is, qui non promouisset, competeret actio; quis scilicet, qui alterum aggreditur, contra naturam, is autem, qui se defendit, secundum naturam fecisse videtur. l. i. §. ii. D. Si quadr.

6) Vid. G. KORTI de iure, quod natura omnia animalia docuit, L. 1727. C. F. HOMMEL de nob. system. iur. nat. et gent. ex sent. ver. lli. capit. ib. 1747. et I. G. WALTHER de primis naturae, iuris naturalis fontibus, Vir. 1750.

Sin potius casto vis est allata padari,
 Quis furor est, hostis crimine mille mori?
 Frustra igitur laudem capias, Lucretia: namque
 Vel furiose ruis, vel scelerata cadis.

Quin fures etiam atque raptores, si res nostras aliter ab iis seruari haud possimus, occidere liceat, vel ideo dubitari nequit, quod, ut PUFFENDORFIVS de O. H. et C. I. §. 21. ait, sine rebus vita nostra seruari haud potest, et aequè hostilem declarat animum, qui res, ac is, qui vitam alterius per iniuriam impetit, modo res non eiusmodi sint, ut contemni mereantur. Atque hinc IMPER. in l. 1. C. unde vi: Rectè possidenti ad defendendam possessionem, quam sine vitio tenebat, inculpatae tutelae moderatione illatam vim propulsare licet.

Nequaquam autem existimandum est, quamlibet aggressoris caedem culpa vacare iureque permissam esse. Sunt potius hic quoque certi fines,

Quos ultra citraque nequit consistere rectum.

Scilicet, ut quis inculpata tutela iure uti fataque alterius impune properare possit, tria maxime desiderantur, puta, ut 1) defensio suscipiatur contra offensionem iniustam et improvisam, 2) ut fiat iusto tempore et modo, s. ut adhibeatur illico vel ex continenti, sitque offensioni aequalis (vulgo proportionata), et 3) ut nulla alia expediendae salutis ratio suppetat. Eodem redit, quod LEXSER, de tutel. culpab. in Med. ad Pand. Vol. XII. P. I. p. 169. scribit: Ad inculpatae tutelam necessarium est, ut a) interfectus auctor et rixae et pugnae fuerit, nec verisimilem causam rixandi pugnandive habuerit, b) reus adgredientem pro conseruandis vita, incolumitate, salute, obtruncarit, c) periculum, quod imminuit, non exiguum, sed alicuius momenti fuerit; idque aequè commode alia via auerti non potuerit, et L. C. SCHROEDER in elem. iur. nat. soc. et gent. §. 594.

Defensio aduersus laesionem praesentem, quae suscipitur pro vita vel corpore conseruando, stricte dicitur inculcata tutela. Haec igitur, quatenus aliud medium non sufficit, vel cum internectione aggressoris licita est; quatenus vero mitius medium suppetit, id eligendum, atque sic illa cum moderamine pro varietate circumstantiarum exercenda est. h) Ac haec quidem omnia non modo sana nituntur ratione, sed calculo etiam veterum philosophorum aequae ac Istorum probantur. Egregie CIC. pro P. Quint. c. 16. *Iugulare ciuem, ne iure quidem quisquam bonus vult: mauult enim commemorare, se, cum posset perdere, pepercisse, quam, cum parcere potuerit, perdidisse. Haec in homines alienissimos, denique inimicissimos viri boni faciunt, et hominum existimationis et communis humanitatis causa: ut, cum ipsi nihil alteri scientes incommoderint, nihil ipsis iure incommodi cadere possit, et* ULPIANVS in l. 5. pr. D. ad L. Aquil. *Qui furem, cum posset apprehendere, maluit occidere, magis est, ut iniuria fecisse videatur, ergo et Cornelia tenebitur, idemque in l. 9. D. ad L. Corn. de sic. Furem nocturnum si quis occiderit, ita deum impune feret, si parcere ei sine periculo suo non potuit, nec non in l. 3. §. 9. D. de vi et vi arm. Eum, qui cum armis venit, possumus armis repellere, sed hoc confessum, non ex interuallo, dummodo sciamus, non solum resistere permissum, ne deiiciatur, sed etsi deiectus quis fuerit, eundem deiicere, non ex interuallo, sed ex continenti. Quisquis igitur alteri non defensionis, sed vindictae causa vim facit, eaue ex interuallo, i. e. periculo non amplius imminente, sed iamiam depulso, vtitur, aut denique, praeter necessitatem occidere alterum, quam mitiore uti remedio, mauult,*

- h) Conf. etiam I. C. QVISTORF *de homicidio permisso; et speciatim de moderamine inculparae tutelae*, Rostoch. 1764. idemque *de moderaminis inculparae tutelae probatione*, Ibid. 1766. ANT. ZEPFICHAL *iuris necessitatis principia philosophica*, Vratis. 1770. *Abhandlung v. d. Criminal-Geferzgebung d. Herren H. E. v. GLOBIG und I. G. HVSTER* p. 119. et I. F. v. SODEN *Geist d. teutschen Criminal-Geferze* P. II. p. 156. fg.

mault, nae is aut pro sicario habendus, aut modum saltem defensionis excessisse censendus, adeoque pro causae qualitate poena vel ordinaria vel extraordinaria addiciendus est, quae de re cum iam saepius dictum fuerit, cramben recoctam hic apponere nolumus. Hisce praemissis iam ad causam Milonianam transeamus, et quo iure, quae iniuria CLODIVS occisus fuerit, videamus.

C A P V T II.

Causae Milonianae coniectio.

Quod saepe fieri solet, ut caede in turba aut rixa commissas res in obscuro sit et ad liquidum perducere haud facile possit, idem fere hic quoque usu venisse videtur, neque adeo mirandum, cum inter veteres scriptores, tum inter recentiores Milonianae commentatores in CLODIVI caede enarranda haud omnino convenire. Mihi quidem argumentum huius orationis, quod CHRISTOPH. CELLARIUM habet auctorem, ad verum quam proxime accedere videtur. Hoc autem ita fere comparatum est.

Eodem tempore P. CLODIVS praeturam, et T. ANNIVS MILO consulatum petebat. CLODIVS hoc consule praeturam suam debilem fore ratus nihil reliquit inausum, quo MILONI repulsam eiusque competitoribus fauorem et suffragia conciliaret. Inde acres contentiones, veteresque inimicitiae ex CICERONIS exilio natae adeo recrudescebant, ut factiones saepe armis inter se contenderent. Post haec MILO, statim die cum magno comitatu Lanuvium profectus, obuium ad Bouillas habuit P. CLODIVM, paucis quidem, sed lectissimis servis constipatum. Ultimo utriusque agmine rixam committente ad pugnam deventum, ac CLODIVS graui vulnere accepto in proximam tabernam a suis delatus est. MILO iam tempus esse ratus vltiscendi iniurias inimici, quem acerbiorem fore, si conualuisset, arbitrabatur, tabernam exturbare

bare iussit et *CLODIVM* occidi. Sic extractus ille est multisque vulneribus interfectus. Cadaver in via relictum *SEX. TEDIUS* Senator, forte ex rure in urbem revertens, sustulit et leſica ſua Romam deportavit. Magnam tum *MILONI* invidiam *VIOR. CLODII, FVLVIA*, conciliauit, vulnera mariti ostendens turbæ aduolanti, a qua corpus in forum delatum et in rostris positum, tandemque in curia crematum est, quo igne et ipsa curia flagrauit. *MILONI* dies dicitur a Clodiapis. *POMPEIVS*, ne iudicium opprimatur a factionibus, in foro milites disponit, *CICERO* autem cum plurimorum offensa patrociniū *MILONIS* suscipit. Sed cum noxa iudicii, utpote milite undique septi, forma, tum reclamazione Clodianorum consternatus non ea, qua solitus erat, constantia dixit. Damnatuſ ergo est *MILO*, et in exilium Massiliam abiit.

Iam, antequam ulterius progrediamur, veterumque, qui huc pertinent, locos scriptorum referamus, duumviros illos, *CLODIVM* puta atque *MILONEM*, quorum causa hic maxime agitur, paulo accuratius ostendere iuuabit. Recte enim *LEYSEVVS Spec. 600. med. 47.* quotiescunque de moderamine inculpatae tutelae disceptatur, confestim ad vitam moresque utriusque pugnatoris respiciendum esse monet. Ac *CLODII* quidem imaginem optime adumbravit *VELLEIVS II. 45.* Per idem, inquires, tempus *P. Clodius*, homo nobilis, disertus, audax, quique dicendi neque faciendi ullum, nisi quem vellet, nosset modum, malorum propositorum executor acerrimus, infamis etiam sororis stupro et actus incesti reus, ob initum inter religiosissima *P. R.* sacra adulterium, cum graues inimicitias cum *M. Cicerone* exerceret, (quid enim inter tam dissimiles amicū esse poterat?) et a patribus ad plebem transiret, legem in tribunatu tulit: Qui cuius *R.* indemnatum interemisset, ei aqua et igni interdiceretur. Cuius verbis et si non nominabatur *Cicero*, tamen solus petebatur. Ita vir optime meritus de rep. conseruatae patriae pretium calamitatem ex filii tulit. Idem intra biennium, ſera *Cn. Pompeii* cura, verum,

verum, ut coepit, interrita, votisque Italiae ac decretis Senatus, virtute atque actione Annii Milonis tribuni pl. dignitati patriaeque restitutus est. Cuius domus, quam infeste a Clodio disiecta erat, tam speciose a Senatu restituta est. Idem P. Clodius in Senatu sub honorificentissimo ministerii titulo M. Catonem a rep. relegavit; quippe legem tulit, ut is quaestor cum iure praetorio adiecto etiam quaestore mitteretur in insulam Cyrum ad spoliandum regno Ptolemaeum. Quod de CLODII adulterio inimicitis cum CICERONE exercitis ait, lucem accipit ex SÆTONIO in *Caes. c. 74*. In P. Clodium, Pompeiae uxoris suae adulterum, atque eadem de causa pollutarum ceremoniarum reum, testis citatus negavit, se quidquam comperisse, quamvis et mater Aurelia et soror Iulia apud eorundem iudices omnia ex fide retulissent; interrogatusque, cur igitur repudiasset uxorem, quoniam, inquit, meos tam suspicione, quam crimine iudicio carere oportere, itemque ex verbis veteris in Milonian. Scholiastis i): Quodam tempore Clodius de uxore Caesaris incestus amoris traxerat flammam, in templo Bonae deae habitu muliebri cum uxore Caesaris inventus est, conscientia sceleris fugit Interamna. Cicero eum vidit fugientem, et contra eum, dum accusaretur Clodius, testimonium dixit. Hinc primo inimicitiae ortae sunt inter Ciceronem et Clodium, nec non ex PLUTARCHO in Cic. k) Cum Clodius cardinem huius depellendi criminis poneret in eo, quod contenderet, ne Romae quidem eo die se fuisset, sed procul urbe egisse, dixit pro testimonio in eum Cicero, venisse ad se domum eum, certisque de rebus sermonem secum habuisse. Quod licet

i) In edit. CIC. quae Amstelodam. 1699. prod. Tom. III. P. I. p. 782. Ceterum de veteri illo Scholiaste vid. I. A. FABRICII *Bibl. lat. T. I. p. 356. edit. noviss.*

k) Vid. PLUTARCHI *Parallēla s. vitas parallelas* (Londini 1723.) Vol. IV. p. 470. PLUTARCHVS an vitae CICERONIS auctor sit, dubitare videtur SEB. CORRADVS in *Quaestura* p. 378. Ego vero haud dubito, nec dubitat WEGVELINVS dans les nouveaux mémoires de l'Académie Royale de Berlin pour l'année 1780. p. 504.

licet verum foret, testimonium tamen dixisse visus est Cicero non veritatis causa, sed uxori ut satisfaceret Terentiae. Simultas enim huic cum Clodio erat causa sororis Clodiae, quam ambire Ciceronis nuptias suspicabatur, et eam ad rem interprete uti Tullio quodam, cui familiaritas cum Cicerone et consuetudo intercedebat arctissima, qui, quod ad Clodiam frequens ventitaret et coleret vicinam, in suspicionem venit Terentiae. Acerba autem mulier et viri potens stimulavit Ciceronem ad conspirandum contra Clodium et ad eum testimonio suo premendum. A patribus ad plebem quomodo transierit CLODIVS, CICERO exponit pro dom. cap. 14. Quae maior calumnia est, quam venire imberbem adolescentulum, bene valentem ac maritum, dicere, filium senatorem populi Romani sibi velle adoptare: id autem scire et videre omnes, non ut ille filius instituatur, sed ut e patriciis exeat, et tribunus plebis fieri possit, idcirco adoptari. Scilicet CLODIVS, ut CICERONEM vlcisceretur eumque licentia maiore vexaret, FONTEIO adolescenti, qui plebeius erat, senatorem se contra ius adoptandum dedit, ut ei Tribuno plebis esse liceret. ¹⁾ Et quod denique de PTOLOMAEO ap. VELLEIVM legitur, FLORVS Epit. III. 9. apertius exprimit: Aderat fatum insularum. Igitur et Cypros recepta sine bello. Insulam veteribus diuitiis abundantem et ob hoc Veneri sacram Ptolomaeus regebat. Sed diuitiarum tanta erat fama, nec falso, ut victor gentium populus et donare regna consuetus, Publio Clodio Tribuno duce, socii viuique regis confiscationem mandaue-rit. His si quis adiunxerit scelera flagitiaque a CIC. in Or. pro Mil. cap. 27. CLODIO exprobrata, nec non illud IUVENALIS II. 26.

Quis coelum terris non misceat, et mare coelo,

Si fur displiceat Verri, homicida Miloni,

Clodius accusat moechos, Catilina Caebeum?

vt

- 1) SVETONIVS in Tib. c. 2. Excepto Clodio, qui ob expellendum urbe Ciceronem plebeio homini, atque etiam natu minori, in adoptionem se dedit.

ut nihil iam de reliquis dicam, quae passim apud veteres de CLODIO leguntur ^{m)}, nonne in eo pessimum agnosceret hominem, talemque, qui ne pilum quidem vllum viri boni haberet, planeque inter deposita ac desperata reip. membra referendus esset?

Paulo quidem melior, neque tamen minore audacia fuit T. ANNIVS MILO, teste ASCONIO in argumento *Or. pro Mil. Annius Milo et Plautius Hypsaëus et Metellus Scipio consulatum petierunt, non solum largitione palam profusa, sed etiam factionibus armatorum succincti. Miloni et Clodio summae erant inimicitiae, ac saepe inter se Milo et Clodius cum suis factionibus Romae depugnaverant, et erat uterque audacia par, sed Milo pro melioribus partibus stabat, nec non CAESARE de B. C. III. 21. Coelius ignominia et dolore permotus palam se proficisci ad Caesarem simulavit, clam nuntiis ad Milonem missis, qui, Clodio interfecto, eo nomine erat damnatus; atque eo in Italiam evocato, quod magnis muneribus datis gladiatoriae familiae reliquias habebat, sibi coniunxit, atque eum in Thurinum ad sollicitandos pastores praemisit. — Milo dimissis circum municipia litteris ea, quae faceret, iussu atque imperio facere Pompeii, quae mandata ad se per Bibulum delata essent, quos ex aere alieno laborare arbitratur, sollicitabat. Apud quos cum proficere nihil posset, quibusdam solutis ergastulis Cosam in agro Thurino oppugnare coepit: eo, cum a Q. Pedio praetore cum legione lapide ictus esset ex muro, periit, itemque VELLEIO Lib. II. cap. 68. Dum in acie Pharsalica Africaeque de summa rerum Caesar dimicat, M. Coelius, vir eloquio animoque Curiōni similis, sed in utroque perfectior, nec minus ingeniose nequam, cum ne modico quidem servari posset, in praetura novarum tabularum auctor extitit, nequiusque Senatus et auctoritate Coss. deterreri, accito etiam Milone Annio, qui non impetrato reditu Iulianis partibus infestus*

m) Conf. ANDR. SCHOTTI *nodos Cic. (eiusd. Obs. human. adiect.) I. 18. nec non III. 14. et 15.*

flus erat, in urbe seditionem, haud magis occulte bellicum tumultum mouens, primo summotus a rep. mox consularibus armis auctore Senatu circa Thurios oppressus est. Incepto pari similis fortuna Milonis fuit, qui Compsam in Hirpinis oppugnans ictusque lapide tum P. Clodio, tum patriae, quam armis petebat, poenas dedit; vir, inquit, et ultra fortem temerarius. Refert etiam ex VARRONE GELLIUS XVII. 18. SALLUSTIVM, scriptorem seriae illius et feuerac orationis, in adulterio deprehensum ab ANN. MLLONE loris bene caesum, tandemque data (quod sane fieri haud oportuit) pecunia dimissum esse.

En nobile virorum par, qui, si expedire visum fuisset, vel coelum ipsumque Iouem sua petiissent audacia. Iam cardo rei in eo vertitur, vt, qua demum ratione CLODIVS occisus fuerit, dispiciamus, qua quidem in re ipsi veteres mire inter se auctores dissentiunt. CICERO in *Miloniana* cap. 10. rem ita narrat, vt non a MILONE CLODIO, sed a CLODIO potius MILONI insidias factas, adeoque illum, tanquam improbum et nefarium insidiatorem, a MILONIS seruis iuste occisum esse, ostenderet. Fit, inquit, Milo obuiam Clodio ante fundum eius, hora fere undecima, aut non multo secus: statim complures cum telis in hunc faciunt de loco superiore impetum: aduersi rhedarium occidunt. Cum autem hic de rheda, reiecta paenula, desiluisset seque acri animo defenderet, illi, qui erant cum Clodio, gladiis eductis partim recurrere ad rhedam, vt a tergo Milonem adorirentur, partim, quod hunc iam interfectum putarent, caedere incipiunt eius seruos, qui post erant: ex quibus qui animo fideli in dominum et praesenti fuerunt, partim occisi sunt, partim, cum ad rhedam pugnari viderent et domino succurrere prohiberentur, Milonemque occisum etiam ex ipso Clodio audirent et reuera putarent, fecerunt id serui Milonis (dicam enim non deriuandi criminis causa, sed vt factum est) neque imperante, neque sciente, neque praesente domino, quod suos quisque seruos in tali re facere voluisset. Haec, sicut exposui, ita gesta

ita sunt, infidiator superatus, ut victa vis, vel potius oppressa virtute audacia est. Enimvero nullam plane hic fidem meretur TULLIUS, quippe quem ita, ut e re sua ac MILONIS fore putaret, factum narrasse, facilis coniectura est. Et quis quales e CICERONE oratore verum audire sperabit, si ipsum fidem suam eleuantem atque (de Or. II. 7.) ita differentem audiuerit: Oratoris omnis actio opinionibus, non scientia continetur. Nam et apud eos dicimus, qui nesciunt, et ea dicimus, quae nescimus ipsi. Itaque et illi alias aliud iisdem de rebus et sentiunt et iudicant, et nos contrarias saepe causas dicimus, non modo ut Crassus contra me dicat aliquando, aut ego contra Crassum, cum alterutri necesse sit falsum dicere, sed etiam ut uterque nostrum eadem de re alias aliud defendat, cum plus vno verum esse non possit. Ut igitur in eiusmodi re, quae mendacio nixa sit, quae ad scientiam non saepe perueniat, quae opiniones hominum et saepe errores aucupetur, ita dicam, si causam putatis esse, cur audiat, itemque pro Cluent. Cap. 50. Errat vehementer, si quis in orationibus nostris, quas in iudiciis habuimus, auctoritates nostras consignatas se habere arbitratur. Omnes enim illae orationes causarum et temporum sunt, non hominum ipsorum ac patronorum. Nam si causae ipsae pro se loqui possent, nemo adhiberet oratorem: nunc adhibemur, ut ea dicamus, non quae nostra auctoritate constituentur, sed quae ex re ipsa causaeque ducantur.

Nihil igitur superest, nisi ut alios, qui hac de re litteris aliquid consignarunt, auctores audiamus. Ac APPIANVS quidem hist. p. 97. edit. Mogunt. d. a. 1529. ita rem narrat: (damus autem ut chartae parcamus et tempori, verba tantum latina,) Clodio, ex propriis agris in equo reuertenti, Milo circa Bouillas occurrit, et quanquam inimici inter se forent, inuicem tamen sibi cessere, et ad iter inceptum unusquisque progressus est. Interim seruus Milonis Clodio insurgens, siue ex mandato eius, siue quod hostem heri sui interimere optaret, ceruicem ense perculit. Hunc igitur sanguine madentem equi-

lio quidam in propinquum diuersorium detulit. Milo cum ceteris seruis ad eum spirantem adhuc, nec dum vita functum, propere accedit, dissimulansque professus est, neque se mortem eius appetiuisse, nec alteri, ut inferret, mandauisse: verum, cum pereuntem intueretur, imperfecto opere discessit. Sed nec is rem ex vero, atque ita, ut facta est, retulit. Reapse enim CLODIVM, initio tantum vulneratum et in tabernam proximam delatum, postea a MILONE, eiusue iussu, occisum esse, VELLEII, DIONIS et ASCONII fide ⁿ⁾ satis constare existimo. Scilicet VELLEIUS *Lib. II. cap. 47.* scribit: Quo tempore P. Clodius a Milone, candidato consulatus, exemplo inutili ^{o)} facto, salutare reip. circa Bouillas, contracta ex occurso rixa, iugulatus est. Milonem reum non magis inuidia facti, quam Pompeii damnauit voluntas, quem quidem M. Cato palam lata absoluit sententia ^{p)}, quam si maturius tulisset, non defuissent, qui sequerentur exemplum; probarentque eum ciuem occisum, quo nemo perniciosior reip. neque bonis inimicius vixerat, DIO autem *Lib. 40. p. 143.* edit. Hanouiens. d. a. 1606.

n) Minus recte igitur in argument. *Or. pro Milon.* quod legitur in edit. I. A. ERNESTI *Vol. II. p. 1344.* Hic orta primum inter seruos rixa, peruenit tandem ad ipsos dominos pugna, qua P. Clodius interfectus est.

o) Inutile hic est noxium, damnosum, quo significato hoc verbum etiam ap. alios scriptores occurrit. Vid. OB. GEFANII *Ohf. lat. lingu. p. 242.* Similiter ap. N. PAVLVM in *Ep. ad. Phil. v. n. ἀχρεῖον* noxium, damnosum significat. Vid. SCIP. GENTILIS in *D. Pauli ad Phil. epist. Commentar.* qui prod. Trai. ad Rb. 1774. p. 149.

p) Qua de re ita ASCONIVS: Fuerunt, qui crederent, Marci Catonis sententia eum esse absolutum. Nam ei bene cum republica actum esse morte P. Clodii non dissimulauerat, et studium in petitione consulatus Miloni et reo offuerat. Nominauerat quoque eum Cicero praesentem, et testatus erat, audisse eum a M. Fauonio ante diem tertium, quam caedes facta erat, Clodium dixisse, perituum esse eo triduo Milonem. Sed Milonis quoque notam audaciam vindicare P. R. vile visum est, s. ut VOSSIVS legere mauult: Sed Milonis quoque notam audaciam veriti a rep. vile visum est.

1606. Milo consulatus candidatus Clodium in via Appia sibi obuiam factum initio leuiter vulnerauit, post veritus, ne is eam rem vindicaret, interfecit, sperans, si omnes seruorum, qui eam caedem fecissent, statim manumitteret, facilius se de caede, mortuo Clodio, quam vulneris, eodem superstiti, absolutum iri. Ea re sub vesperam Romam perlata, vehemens perturbatio coorta est, oblata factionibus ansa belli ac malefactorum: atque hi quoque, qui neutrarum erant partium, tamen humanae sortis memores, rem indigne ferebant, idque eo amplius, quod hac occasione Milonem quoque de medio tolli cupiebant, et ASCONIUS denique in argumento Miloniana: Milo rheda uehebatur cum uxore Fausta, et M. Fusio familiari suo: sequebatur eos magnum seruorum agmen, inter quos gladiatores quoque erant, ex quibus duo noti, Eudamus et Birria: hi in ultimo agmine tardius euntes cum seruis P. Clodii rixam commiserunt, ad quem tumultum cum respexisset Clodius minitabundus, humerum eius Birria romphaea (i. e. framea s. gladio ex utraque parte acuto, ut docet VICAR in Vocab. iur. s. v. framea) traiecit. Inde cum orta esset pugna, plures Miloniani accurrerunt. Clodius vulneratus in tabernam proximam Bouillano delatus est. Milo, ut cognouit vulneratum Clodium, cum sibi periculosius illud etiam uiuo eo futurum intelligeret, occiso autem magnum solatium esset periturus, etiamsi subeunda esset poena 9), exturbari tabernam iussit. Fuit antesignanus seruorum eius M. Fustenus, atque ita Clodius latens extractus est multisque vulneribus confectus: cadaver eius in via relictum, quia serui Clodii aut occisi erant, aut grauiter saucii latebant. O factum indignum, nefarium, crudelissimum! Atque hoc tamen CICERO non modo defendit, sed deorum etiam immortalium consilio peractum esse palam profitetur, Non est, inquit cap. 31. humano consilio, ne mediocri quidem deorum immortalium cura res illa per-

9) En! quam vere scripserit PETRONIUS cap. 125. Dii deaque, quam male est extra legem viuensibus! Quidquid meruerunt, semper expectans.

perfecta. Religiones mehercule ipsae, quae illam belluam cadere viderunt, commosse se videntur, et ius in illo suum retinuisse. En probum oratorem atque egregium, qui vel maximum defendere scelus et ad deos referre auctores haud veretur! Nesciuit scilicet, TVLLI, quod vetus quidam ait philosophus: Peccare et peccato favere perinde est.

CAPV T III.

De iudicii Miloniani forma causaeque exitu.

P. CLODII caedes maximos Romae ciebat motus, vt ex VELLEII, DIONIS, ASCONII aliorumque locis cap. II. iamiam productis satis apparet ¹⁾. Quanti haec res visa fuerit momenti, vel inde patet, quod omnes fere, qui historiam illorum temporum enarrarunt, scriptores caedis etiam Clodianae meminerint, et CAESAR adeo in *Commentar. suis de B. G. Lib. VII. cap. I.* illius mentionem iniecerit his verbis: *Quieta Gallia Caesar, vt constituerat, in Italiam ad conuentus peragendos proficiscitur, ubi cognoscit de P. Clodii caede.* Erant quidem Romae, qui de ea magnopere laetarentur, illamque cum sibi tum reip. vnice gratularentur, quorum in numero fuit CICERO, vt ipse fatetur in *Philip. II. c. 9.* At, inquiens, *Miloni ne favere quidem potui; prius enim rem transiegit, quam quisquam eum suspicaretur facturum esse. At ego suasi. Scilicet is animus erat Milonis, vt prodesse reip. sine suatore non posset. At laetatus sum. Quid? ergo in tanta laetitia cunctae civitatis me unum tristem esse oportebat* ²⁾. Sed contraria ex parte magnus erat

¹⁾ SVETONIUS in *Caes. cap. 26.* Inter quae consternata P. Clodii caede Rep. cum Senatus unum Cos nominatimque Cn. Pompeium fieri censuisset, rel.

²⁾ Quo loco silentio haud praetereundum est, quod scribit QUINTILIANUS *Iust. Or. VI. 3.* Praeclare Cicero, cum obiceret Miloni accusator in argu-

erat Clodianorum numerus, qui mortui quoque causam agentes MILONEM odio maximo prosequerentur. Denique nec deerant, qui a neutris quidem partibus starent, ceterum tamen, ut DIO ait, humanae sortis memores MILONIS factum indigne ferrent, eumque tanquam nefarium et periculosum reip. euiem de medio tolli cuperent.

Ad formam iudicii Miloniani quod attinet, de criminibus eo tempore non amplius cognoscebat populus, nec per se, nec per quaesitores a se datos, sed erant eam in rem constituti Praetores, nisi crimen esset perpetratum, de quo nondum legibus latis quaestiones perpetuae erant constitutae, vel nisi crimen esset atrocius, de quo extra ordinem quaerendum videretur. Aliquando ad inuidiam reorum, licet lex esset de crimine admissio, ad populum relatum fuit, ut quaesitorem extra ordinem constitueret. Atque hoc etiam in causa Miloniana factum est ¹⁾. POMPEIUS scilicet, qui tunc consul erat sine collega, cuique tota commissa fuerat respublica, legem tulit, ut quaesitor, i. e. praefes iudicii extraordinarii, populi suffragio crearetur ex consularibus. Creatus est CN. DOMITIUS AENOBARBUS; iudices autem lecti ex florentissimis ordinibus ipsa lumina, adeo ut, nunquam neque clariores viros neque sanctiores propositos esse, ASCONIUS auctor sit. Sortitione iudicum facta, numerus quidem fuit LXXXI. Postquam autem et accusator et reus quinos e singulis ordinibus reiecerant, vnus et quinquaginta relictus sunt, XVIII. senatores, XVII.

argumentum factarum Clodio insidiarum, quod Bouillas ante horam nonnam diuertisset, ut expectaret, dum Clodius a villa sua exiret, et identidem interrogaret, quo tempore Clodius occisas esset; respondit: Sero.

- t) Conf. CAR. SIGONIUS *de ant. iur. ciu. Rom.* II. 18. idemque *de iudic.* III. 4. nec non ADR. VAN DER HOOP *de iis, qui antiquitus apud Romanos de criminibus iudicabant*, in *Suppl. Thes. Meerm.* (Hagae Com. 1780.) p. 605.

XVII. equites, et XVI. tribuni aerarii. Placuerat etiam, vt serui MILONIS in caput domini torquerentur; quod videns MILO, ne serui, CLODIVM ab ipso occisum esse, confiterentur, eos manumisit, vt iam liberi torqueri non possent^{v)}. POMPEIVS cum summa celeritate praesidium comparasset, familiam cum MILONIS, tum FAVSTAE, vxoris eius, exhibendam postulauerunt duo adulescentes, qui APPII CLAVDII vocabantur, erantque C. CLAVDII, CLODII fratris filii, ideoque patrum mortem, fratre velut auctore, persequabantur. MILONI aderant Q. HORTENSIVS, M. CICERO, M. MARCELLVS, M. CALIDIVS, M. CATO, FAVSTVS SVLLA. HORTENSIVS dixit, liberos iam esse, qui pro seruis postularentur. MILONEM cum ipse timeret POMPEIVS, aut timere certe simularet, plerumque non domi suae, sed in hortis manebat, circa quos etiam magna manus militum excubabat. Quid? quod Senatam adeo semel in porticu sua habuit, dicens, timere se aduentum MILONIS. P. CORNIFICIVS, MILONEM ferrum intra tunicam ad femur alligatum habere dicens postulauit, vt femur nudaret. Iam postquam ille sine mora tunicam leuauerat, CICERO exclamauit, huic omnia alia, quae in MILONEM dicerentur, crimina similia esse.

- v) Quemadmodum apud Romanos quaestiones proprie ad seruos pertinebant, ita de his etiam nulla olim quaestio erat in dominos, nisi de incestu. CIC. *pro Mil.* cap. 22. Idem *pro Deiotar.* cap. 1. more maiorum de seruo in dominum ne tormentis quidem quaeri licet. Postea ab hoc iure recessum est in criminibus nonnullis atrocioribus, vt patet ex l. 1. §. 5. *sq. D.* et l. 1. *C. de quaest.* vbi ita Impp. *Quaestionem de seruis contra dominos baleri non oportet, exceptis adulterii criminibus, item fraudati census accusationibus, et crimine maiestatis, quod ad salutem Principis pertinet. In ceteris autem, quanquam ea, quae seruus contra dominum dixit, iudicaturi sententiam formare non debeant, tamen, si aliis quoque probationibus fides veritatis inuestigetur, praescriptionis inuidia euascent.* In pecuniariis vero causis nec inopia probationum seruos contra dominum interrogari posse manifestum est.

esse. METELLVS SCIPIO dicebat, MILONEM subito post horam quartam senatu missa cum seruis amplius CCC. armatis obuiam CLODIO contendisse, et supra Bouillas inopinantem in itinere aggressum: ibi CLODIVM tribus vulneribus acceptis Bouillas perlatum; tabernam, in quam profugerat, expugnatam a MILONE: semianime CLODIVM extractum in via Appia occisum esse, anulumque eius ei morienti extractum: deinde MILONEM, cum sciret, in Albano paruulum filium CLODII venisse ad villam, et cum puer ante subtractus esset, de seruo Alicore quaestionem ita habuisse, vt eum articulatim consecraret: villicum et duos praeterea seruos iugulasse: ex seruis CLODII, qui dominum defenderint, vndecim esse interfectos: MILONIS duos solos saucios factos esse: hanc ob causam MILONEM postero die XII. seruos, qui ei maxime operam nauassent, manumisisse, populoque tributum singula millia aeris ad defendendos de se rumores dedisse. MYNACIVS PLANCVS in concionem producebat M. AEMILIVM PHILEMONEM, qui dixit, se quatuor cum aliis hominibus liberis, cum CLODIVS occideretur, superuenisse, cumque ob id proclamassent, omnes abreptos et in villam MILONIS perductos, ibique per duos menses praeclusos fuisse, quae res, seu vera seu falsa, magnam inuidiam MILONI contraxit. Testes interrogauerunt CICERO, MARCELLVS et MILO ipse^x). Multi ex iis, qui Bouillis habitabant, testimonium dixerunt de iis, quae ibi facta erant, cauponem occisum, tabernam expugnatam, corpus CLODII in publicum extractum esse. Virgines quoque Vestales dixerunt,

C 2

mulie-

x) En luculentissimum exemplum, quo confirmatur id, quod de interrogatione testium apud Rom. vel ab ipsis partibus facta iam alibi obseruatum fuit. Rem omnem narrat ASCONIVS PEDIANVS in *Commentar. in Orat. aliquot Cic.* qui e recensione PHIL. MELANCHTHONIS *Ilagenoiae* fine ment, anni prod. p. 6, sq.

mulierem ignotam venisse ad se, quae MILONIS mandato votum solueret, quod CLODIVS occisus esset.

Ipso iudicii die omnes tota vrbe clausae erant tabernae, praesidia in foro et circa omnes fori aditus disposita, POMPEIVS pro aerario, septus delecta militum manu, confedit^y). Tribus accusatoribus vnus respondit CICERO, sed non ea, qua solebat, constantia. Rem optime narrat PLVTARCHVS l. c. Vol. IV. p. 478. Milo in iudicium adductus defensorem adhibuit Ciceronem. At senatus timens, ne viro claro et acri reo ciuitatis quies turbaretur, permisit Pompeio, ut huic et ceteris iudiciis praesset, praesidiumque haberet ad securitatem urbis et iudiciorum. Cum ille ante lucem summa fori cum armatis insedisset, metuens Milo, ne spectaculo insolito Cicero territus minus recte causam diceret, persuasit ei, ut lectica delatus in forum quiesceret, dum conuenirent iudices et frequens esset corona. Enimvero non modo in bello ille timidus erat, sed accedebat etiam ad dicendum trepidus, ac multis in causis vix tandem horrere et tremere medio desinebat ardore et statu orationis. L. Murenam, quem accusauit Cato, defensurus totam noctem lucubrauit, dum Hortensium, cuius mire placuerat oratio, superare contendit, ut prae nimia sollicitudine et vigiliis ita affecerit valetudinem, ut concedere illi videretur. Ac tunc, ut ad iudicium Milonis lectica delatus fuit, et Pompeium contemplatus locis superioribus velut in castris confidentem, atque circum-

y) CIC. in *Milonian.* cap. 1. Atque hinc LVCANVS Lib. I, v. 319.

— Quis castra timentis

Nescis mixta foro? gladii cum triste micantes

Iudicium insolita trepidum cinxere corona,

Atque auso medias irrumperere milite leges

Pompeiana reum cluserunt signa Milonem?

et L. II. v. 479.

— Tua classica seruat

Oppositus quondam polluto viro Miloni.

cumfulgens undique armis forum, obstupuit, et orationem aegre cum tremore corporis et linguae haesitantia exorsus est, cum Milo ipse fortis animo et celso praesto esset certamini, nec capillos demittere, vel sumere atram vestem sustinuisset, quod maximum momentum fuisse appareret ad eius damnationem. ASCONIVS quidem scribit: Cum quibusdam placuisset, ita defendi crimen, interfici Clodium pro republica fuisse, quam formam M. Brutus secutus est in ea oratione, quam pro Milone composuit et edidit, quamvis non egisset ²⁾, Ciceroni id non placuit, quod non, qui bono publico damnari, idem etiam occidi indemonstratum posset. Itaque cum, insidias Milonem Clodio fecisse, possuissent accusatores, quia falsum id erat, — Cicero apprehendit, et contra Clodium Miloni fecisse insidias disputavit, eoque tota oratio eius spectavit. Oratio autem Miloniana, quae ad nostra pervenit tempora, paulo aliter comparata est, quippe in qua CICERO CLODIUM iure occisum esse contendit, et primo quidem, quod MILONI insidiatus sit, deinde, quod cuius fuerit perniciosus, quem e medio tolli reipublicae conduxerit. Quare illa ASCONII verba de ea intelligenda sunt oratione, quam CICERO (anno aetatis 55. Urbis 702.) reapse habuit; nequaquam autem de illa, quam postea maiore otio conscripsit, et MILONI Massiliam, quo is in exilium abierat, transmissit. Certe primam illam orationem, quam oratiunculam vocat QVINTILIANVS *Inst. Or. IV. 3.* ASCONII tempore adhuc exstitisse, ipse testatur his verbis: *Manet autem illa quoque excepta eius oratio: scripsit vero hanc, quam legimus, ita perfectam, ut iure prima haberi possit.* Ceterum, etsi secunda oratio Miloniana, scripta illa hodieque superstes, adeo perfecta est, ut non modo a QVINTILIANO *Inst. Or. IV. 2. et XI. 3. pulcherrima nobilissimaque dicatur*, sed a plurimis etiam aliis summis efferatur laudi.

C 3

2) QVINTILIANVS *Inst. Or. X. 1. Pro Milone orationem Brutus exercitationis gratia scripsit, etiamsi egisse eum Cornelius Celsus falso existimat.*

laudibus, primaque inter omnes reliquas CIC. orationes vulgo habetur^{a)}, nihil tamen gratiae eo labore CICERO apud Milonem iniit, quippe qui illum ideo potius irrisit et ludibrio habuit. Rem narrat DIO CASS. l. c. p. 145. *Cicero, cum Pompeium armatis militibus praeter consuetudinem in iudicio adesse videret, animo collapsus ac ita terrore percussus est, ut nihil eorum, quae praemeditata erant ipsi, diceret, sed breui ac languida oratione contentus finem dicendi fecit. Quae enim nunc Ciceronis, quasi tum pro Milone habita, extat oratio, eam postea temporis Cicero animo collecto per otium scripsit, ferturque Milo, cum in exilium actus missam hanc sibi a Cicerone orationem legisset, Ciceroni rescriptisse, bene sibi euenisse, quod eam in iudicio non pronuntiasset: nunquam enim futurum fuisse, si hoc modo pro se dictum fuisset, tantos ut nullor Massiliae^{b)} (eo enim exul se contulerat) ederet. Quod Milo non eo animo scripsit, quasi delectaretur praesenti statu, (quippe multa inpetrandi reditus sui causa molitus est,) sed Ciceronem verbis exagitans, quod, cum defensionis tempore nihil causae conducibile dixisset, deinde inutiles orationes componeret sibi que mitteret, quasi vero tum aliquid ab his iuuari posset.*

Ego quidem illa oratione, si verba, artificium rhetoricum atque ingenium oratoris spectes, nihil pulchrius, nihil elegantius scri-

a) ANDR. SCHOTTUS in 'nodis' Cic. III. 13. *Miloniana Tullii, etsi longa ea oratio, ut quidem a Cic. conscripta est, quae habita longe breuior, iure tamen prima omnium, auctore Pediano, censenda. Nonnulli tamen Cluentianam Tullianarum orationum principem arbitrantur. Vid. ABRAMVS ad Or. Cic. pro. Mil. p. 825.*

b) Massilia Galliae Narbonensis vrbs, (hodie Marseille) de qua CIC. pro Flacco n. 63. Neque vero re, Massilia, praetereo, cuius ego ciuitatis disciplinam atque grauitatem non solum Graeciae, sed haud scio an cunctis gentibus anteponendam dicam, quae tam procul a graecorum omnium regionibus, disciplinis linguaque diuisa cum in ultimis terris cincta gallorum genibus barbariae fluctibus allunatur, sic optimatum consilio gubernatur, ut omnes eius instituta laudare facilius possint, quam aemulari.

scribi posse existimo. Illud etiam NIC. ABRAMO concedo, eiusmodi hanc orationem esse, ut, nisi scripto illa mandata fuisset, vix habuerit Roma, quo suos oratores omnium gentium scriptoribus anteferet. Ceterum tamen nec defunt naevi et maculae quaedam, quas quidem libenter inde abesse vellem. Ita e. g. TVLLIUS cap. 3. scribens: *Itaque hoc non sine causa etiam fidei fabulis doctissimi homines memoriae prodiderunt, eum, qui patris ulciscendi causa matrem uecauisset, variatis hominum sententiis non solum divina, sed etiam sapientissimae deae sententia liberatum;* haud meminisse videtur, quod dixerat pro Rosc. Amer. cap. 24. *Videtisne, quos nobis poetae tradiderunt, patris ulciscendi causa supplicium de matre sumfisse, — tamen ut eos agitent furiae, neque confidere usquam patiantur?* Quando porro cap. 10. ait: *Fecerunt id servi Milonis, neque imperante, neque sciente, neque praesente domino, rel. iam* QVINTILIANVS *Inst. Or. VII: 1. monuit: At haec tam timida defensio detrahit auctoritatem illi, qua recte dicebamus occisum. Adiciitur: quod suos quisque servos in tali re facere voluisset. Hoc eo est utilius, quod saepe nihil placet, et aliquid dicendum est. Neque illud concoquere possum, quod CICERO scribit cap. 31. Vos iam Albani tumuli atque luci, vos, inquam, imploro atque testor, vosque Albanorum obrutae arae, sacrorum P. R. sociae et aequales, quas ille praeceps amentia, caesis prostratisque sanctissimis lucis, substructionum infans molibus oppresserat. Vestrae tum arae, vestrae religiones vigerunt, vestra vis valuit, quam ille omni scelere polluerat. Tuque ex tuo edito monte, Latiaris sancte Iupiter, cuius ille lacus, nemora finesque saepe omni nefurio supro et scelere macularat, aliquando ad eum puniendum oculos aperuistis: vobis illae, vobis vestro in conspectu serae, sed iustae tamen et debitae poenae solutae sunt. Nisi forte hoc etiam casu factum esse dicemus, ut ante ipsum sacrarium Bonae deae, quod est in fundo T. Sextii Galli, inprimis honesti et ornatu adolescentis, ante ipsam, inquam, Bonam deam, cum praelium commississet,*
pri-

primum illud vulnus acceperit, quo teterrimam mortem obiret, ut non absolutus iudicio illo nefario videretur, sed ad hanc insignem poenam reservatus. Nae, qui eiusmodi res loquitur, auditores suos pro peponibus habet, iisque illudit. Quouis enim pignore certare ausim; Ciceronem ipsum ea omnia suavis pro somniis fabulisque habuisse. Sed ita solent, qui fucum imperitioribus facere, eosque nihil tale opinantes fallere gestiunt. Taceo iam, CICERONEM nonnulla, quae MILONI, vt supra diximus, exprobrabantur, sicco plane pede praeteriisse, quod etiam ASCONIVS animadvertit, *Et si*, inquit, *nullam de his criminibus mentionem fecit Cicero, tamen, quia ita compereram, putavi exponenda.* De eo, quod ad cardinem rei pertinet, *cap. seq.* exponemus.

Quidquid autem TVLLIVS dixerit, infelix causae fuit exitus, tulitque MILO, quam meruit, sortem. Damnatus quippe est, et quidem propter CLODII caedem, teste DIONE l. c. p. 145. *Milo in iudicium ob crimen ambitus pertractus non est, quia caedis culpa, in qua erat, maior extabat. — Ita iudicium sine turba confesso facto alii aliis de causis, Milo autem cum quibusdam aliis propter caedem Clodii damnatus est c).* Senatores damnauerunt XII. absoluerunt VI. Equites condemnauerunt XIII. absoluerunt IV. Tribuni aerarii condemnauerunt XIII. absoluerunt III. vt ASCONIVS refert, qui hoc

c) Faciunt huc etiam verba CICERONIS in *Milonian. c. 29.* *Eius igitur mortis sedetis ultores, cuius vitam si puteris per vos restitui posse, nolitis, ex de eius nece lata quaestio est, qui si eadem lege remuiscere posset, lata lex nunquam esset.* Tulerat quidem POMPEIVS legem de vi, sed nominatim ea caedes in via Appia facta comprehensa fuerat. ASCONIVS l. c. p. 7. adeoque fere perinde est, siue MILONEM de vi, siue de caede damnatum esse dicas. Ceterum poena eorum, qui damnabantur de vi, eadem erat ac L. Corn. de sic. puta aquae et ignis interdictio, teste CICERONE *Philipp. I n. 23.* *Quid? quod obrogatur legibus Caesaris, quae iubent ei, qui de vi, itemque ei, qui maiestatis damnatus sit, aqua et igni interdicti.*

hoc etiam adiicit: Milo postero die factus reus ambitus^{d)} apud Manlium Torquatium, absens damnatus est. — Post paucos dies quoque apud Favonium quaestorem de sodalitiis damnatus est, accusante P. Fulvio Nerato, cui lege praemium datum est. Deinde apud L. Fabium quaestorem iterum absens damnatus est de vi. Milo in exilium Massiliam intra paucissimos dies profectus est. Bona eius propter alieni aeris magnitudinem semuncia venierunt. Tulerat scilicet iam anno V. C. 673. SVLLA dictator legem de sicariis, quae vulgo dicitur Cornelia, qua poena huic crimini constituta est aquae et ignis interdictio. Iam et si POMPEIUS in causa Miloniana novam tulerat legem, ea tamen bonorum etiam ademtionem sancitam esse haud legimus, neque adeo MILONI bona ademta sunt, sed teste ASCONIO propter aeris alieni magnitudinem semuncia venierunt. Atque huius rei fidem etiam facit COELIVS ad Cic. VIII. 3. Quod ad Philotimi liberti officium et bona Milonis attinet, dedimus operam, ut et Philotimus quam honestissime Miloni absenti eiusque necessariis satisfaceret, et secundum eius fidem et sedulitatem existimatio tua conservaretur, et ipse CIC. ad Att. V. 8. Roma acceperam litteras, Milonem meum queri per litteras iniuriam meam, quod Philotimus socius esset in bonis suis. Id ego ita fieri volui de C. Duronii sententia, quem et amicissimum Miloni perspexeram, et talem virum, qualem tu iudicas, cognoram. Eius autem consilium meumque hoc fuerat, primum, ut in potestate nostra esset res, ne illum malus emtor alienus mancipiis, quae permulta secum habet, spoliaret, deinde, ut Faustae, cui cautum ille voluisset, ratum esset. Erat etiam illud, ut ipsi nos, si quid servari posset, quam facillime servaremur. Nunc rem totam perspicias velim. Nobis enim scribuntur saepe maiora. Sed si ille queritur, si scribit ad amicos, si idem Fausta vult, Philotimus, ut ego ei coram dixeram, mihi que ille
recepit.

d) Ipse CIC. in *Milonian. cap. 35.* scribit, MILONEM plebem et infimam multitudinem tribus patrimonii delinuisse muneribusque placasse.

repperat, ne sit inuito Milone in bonis. Scribit quidem MARCIANVS in l. 3. §. 5. D. ad L. Corn. de sic. Legis Corneliae de sicariis et veneficiis poena insulae deportatio est et omnium bonorum ademptio. Sed dudum alii docuerunt, veram Legis Corneliae poenam fuisse aquae et ignis interdictionem, cui postea demum bonorum accessit ademptio, teste SVETONIO in Caes. cap. 42. Poenas facinorum auxit, et cum locupletes eo facilius scelere se obligarent, quod integris patrimoniis exsulabant e), parricidas bonis omnibus, reliquos dimidia parte multauit f), vbi parricidarum appellatione generatim veniunt homicidae, sicarii. Aquae et ignis interdictioni postea successit deportatio. Sequentes autem Imp. poena deportationis in honestioribus seruata, humiliores capite plectendos censuerunt. PAVLVS Sent. V. 23. 1. atque hinc IUSTINIANVS in §. 5. Inst. de publ. iud. Idem lex Cornelia de sicariis, quae homicidas ultore ferro persequitur, vel eos, qui hominis occidendi causa cum telo ambulant.

C A P V T IV.

Iustene an iniuste damnatus sit Milo?

TULLIVM si audiamus, de iniustitia iudicii Miloniani nullum nobis superesse dubium debet. Adeo enim causae suae confidit, ut cap. ult. scribere haud dubitaret: *Hicne vir patriae natus usquam, nisi in patria, morietur? aut, si forte, pro patria? huius vos animi monumenta retinebitis, corporis in Italia nullum sepulcrum esse patiemiini? hunc sua quisquam sententia ex hac urbe expellet, quem omnes urbes expulsum a vobis ad se vocabunt? O terram illam beatam,*
quae

e) Verissime IUVENALIS I. 48.

— *Quid enim salvis infamia nummis?*

f) Vid. NIC. KLOECKHOF bist. iur. rom. de bon. damnator. L. B. 1749. p. 80. et ALOYS. CREMANI ius crim. (Ticini 1779.) Tom. I. p. 156.

quae hunc virum exceperit: hanc ingratam, si eiecerit, miseram, si amiserit! Sed quidquid, TVLLI, scripseris, nunquam tamen, vt in sententiam tuam concedam, persuadebis. Quod ne temere dixisse videar, ad cardinem rei veniamus, paulloque accuratius TVLLII argumenta examinemus. Iure, ait, CLODIVS occisus est, et quidem 1) tanquam improbus insidiator, 2) tanquam nefarius et perniciosus reip. ciuis. Enimuero insignem hic repugnantiam deprehendere mihi videor. Cap. II. CIC. ait: *Nihil dico, quid resp. consecuta sit, nihil, quid vos, nihil, quid omnes boni; nihil sane id profit Miloni, qui hoc fato natus est, vt ne se quidem seruare potuerit, quin vna remp. vosque seruaret. Si id iure non posset, nihil habeo, quod defendam: sin hoc et ratio doctis, et necessitas barbaris, et mos gentibus, et firis natura ipsa praescripfit, vt omnem semper vim, quacunque ope possent, a corpore, a capite, a vita sua propulsarent, non potestis hoc facinus improbum iudicare, quin simul iudicetis, omnibus, qui in latrones inciderint, aut illorum telis, aut vestris sententiis esse pereundum, et postea tamen Cap. 28. longam incipit orationem, vt probet, CLODIVM, etiamsi insidiator haud fuisset, tamen tanquam perniciosissimum ciuem occidi cum laude interfectoris potuisse, et inter alia his vtitur verbis. Quamobrem, si cruentum gladium tenens clamaret T. Annius, Adeste, quaeſo atque audite ciues! P. Clodium interfeci: eius furores, quos nullis iam legibus, nullis iudiciis frenare poteramus, hoc ferro, et hac dextra a ceruicibus vestris repuli, per me vt vnum ius, aequitas, leges, libertas, pudor, pudicitia in ciuitate manerent: esset vero timendum, quonam modo id ferret ciuitas? quod quidem superioribus TVLLII verbis haud congruit. Sed mittamus paulisper haecce contraria, et quid singulis argumentis veri falliue insit, dispiciamus.*

Reliquum est, ait CIC. cap. 9. vt nihil iam aliud quaerere debeatis, nisi, uter utri insidias fecerit, idemque fere etiam cap. II. repetit.

Feci, inquit MILO, sed meruit, insidiantem occidi. Summa igitur defensionis, ut in argumento Miloniana recte monuit FABRICIUS, hoc syllogismo, ex adiunctis personae conclusio, continetur:

Insidiator sceleratus iure interficitur:

CLODIVS est insidiator sceleratus:

CLODIVS igitur iure interfectus est.

Mihi vero utraque propositio vitio manifesto laborare videtur. Prior enim, ut facile omnes mihi concedent, hisce limitibus restringenda est: *si aliter saluus esse non possis*. Hoc sana docet ratio, hoc aequum et iustum est, hoc ipse haud diffietur CICERO pro P. Quint. cap. 16. quem locum supra cap. 1. iam protulimus, hoc veteres loquuntur Icti, eod. cap. laudati, idemque in §. 2. I. de L. Aquil. proficitur IVSTINIANVS: *Itaque qui latronem occiderit, non tenetur, utique si aliter periculum effugere non potest*. Insidiae porro vel generales esse possunt, vel speciales, seu, ut clarius loquar, insidiari alter alteri potest vel certo tantum die certaue occasione, vel omni tempore, occasionem quaerens, quo fata properare alterius possit; cumque inter duas has species permultum interfit, clarius CICERO, de qua ipsi sermo sit, exprimere debuisset. Deinde plane falsum est, CLODIVM eo die, quo vivere desit, MILONI insidias struxisse. Multus quidem in eo fuit CICERO, ut probabile hoc faceret, eaque maxime in re vim sui ostendit ingenii, quod magnopere veneror atque admiror. Pulcher inprimis locus est cap. 19. et 20. *Video adhuc constare omnia: Miloni utile fuisse, Clodium vivere: illi ad ea, quae concupierat, optatissimum interitum Milonis: odium fuisse illius in hunc acerbissimum, in illum huius nullum: consuetudinem illius perpetuam in vi inferenda, huius tantum in repellenda: mortem ab illo denunciatam Miloni, et praedictam patam, nihil unquam auditum ex Milone: profectionis huius diem illi notum,*

tam, reditum illius huic ignotum fuisse: huius iter necessarium, illius etiam potius alienum: hunc prae se tulisse, se illo die Roma exiturum, illum eo die se dissimulasse rediturum: hunc nullius rei mutasse consilium, illum causam mutandi consilii finxisse: huic, si infidiaretur, noctem prope urbem expectandam; illi, etiamsi hunc non timeret, tamen accessum ad urbem nocturnum fuisse metuendum, rel. Sed haec omnia merae sunt coniecturae, quibus nihil inest veri, quaeque clarissimis penitus evertuntur testimoniis. Satis enim constare arbitror, neutrum eo die alteri infidias fecisse, sed forte fortuna rixam illam, quae CLODII caedi occasionem dedit, accidisse. En verba ASCONII, testis sane locupletissimi omnique exceptione maioris: Itaque cum, infidias Milonem Clodio fecisse, posuissent accusatores, quia falsum id erat, (nam forte illa rixa commissae fuerat,) Cicero apprehendit, et contra Clodium Miloni fecisse infidias disputavit; sed ita constitit, ut diximus, neutrius consilio pugnatum esse eo die, verum forte occurrisse: ex ea rixa servorum ad eam caedem peruentum; et iterum; Videbantur non ignorasse iudices, inscio Milone initio vulneratum esse Clodium, sed compererant, postquam vulneratus esset, iussu Milonis occisum.

Si MILONI infidiatus fuisset CLODIVS, nae ei servi XXX. cum MILO amplius CCC. et inter hos etiam gladiatores, secum haberet, haud suffecissent. Quid quaeso facilius ei fuisset, quam ope atque auxilio tanti servorum agminis CLODII laqueos effugere? Quod si autem CICERO hoc voluit, CLODIVM MILONI perpetuas struxisse infidias, unde quaeso hoc ipsi constitit? qua ratione id probatam dedit?

At mortem MILONI minatus est CLODIVS. *Palam (verba sunt CIC. cap. 9.) distabat, consulatum Miloni eripi non posse, vitam posse. Significavit hoc saepe in senatu, dixit in concione: quin etiam*

*Fauonio, quaerenti ex eo, qua spe fureret Milone viuo, respondit, tri-
duo illum, ad summum quadriduo periturum: quam vocem eius ad hunc
M. Catonem statim Fauonius detulit. Audio. Sed dudum alii mo-
nuerunt, solas minas, nisi cum praesentissimo coniunctae sint pe-
riculo, ad moderamen inculpatae tutelae haud sufficere. Bene
SENECA: Nihil est stultius homine verba metuente, idemque de Ir.
II. 32. Ille magnus et nobilis est, qui more magnae ferae latratus mi-
nutorum canum securus exaudit. Deinde, quod praecipuum est,
vicissim etiam MILO saepe CLODIO minatus erat, vt ASCONIUS re-
fert his verbis: Notum tamen erat, utrumque mortem alteri saepe mi-
naturum esse, et sicut suspectum Milonem maior, quam Clodii, familia
faciebat, ita expeditior et paratior ad pugnam Clodianorum, quam
Milonis, fuerat, adeoque in pari ambo versabantur culpa, nec
CLODII minae MILONEM itidem minitantem excusant.*

Poterat sane MILO CLODIO iamiam vulnerato et in tabernam
proximam delato, quiescere, nec esse debebat vltor iniuriae, pu-
nitor doloris sui. Recte IUVENALIS XIII. 189.

— — *Quippe minuzi*

Semper et infirmi est animi exiguique voluptas

Vlso. — —

Turpe semper putatum est, hosti insultare iacenti; eundem au-
tem iam sanguine madentem atque absconditum, exturbata, ubi
latet, taberna, rursus in medium protrahere multisque vulneri-
bus occidere, id plane inhumanum atque nefarium est. Hoc
ne barbari quidem faciunt aut latrones, qui dudum omnem exue-
runt humanitatem, nedum ciues reip. in qua leges sunt et magi-
stratus, qui illos contra inimicorum vim atque tela defendere pos-
sint. Bene CIC. in *Or. post redit. cap. 6.* Ego, in qua ciuitate ni-
hil valeret senatus, omnis esset impunitas, nulla iudicia, vis et ferrum
in

in foro versarentur, cum privati se parietum praesidio, non legum tuerentur; rempublicam esse nullam putavi, idemque de Leg. III. 18. Nihil est exitiosius ciuitatibus, nihil tam contrarium iuri et legibus, nihilminus ciuile et humanum, quam composita et constituta republica quidquam agi per vim, et pro Caec. cap. XI. Nec iuri quidquam tam inimicum, quam vis, nec aequitati quidquam tam infestum est, quam conuocati homines et armati.

Restat vltimum CICERONIS argumentum, quod tamen ipse, vt supra iam monuimus, quodammodo infringit, quoque in oratione, quam reapse habuit, haud vsus esse videtur. Ita scilicet ratiocinatur:

Qui sceleratum et perniciosum reip. ciuem aut hominem interficit, non habendus est nefarius.

MILÒ occidit sceleratum et perniciosissimum hominem,
P. CLODIUM.

Ergo MILO non est nefarius habendus.

Quid? quod non modo nulla poena, sed laude potius et praemio dignum esse MILONEM contendit, quod hominem tam perniciosum e medio sustulerit, et rempublicam a ciue tam periculoso liberauit. *Graeci homines, inquit cap. 29. deorum honores tribuunt iis viris, qui tyrannos necauerunt. Quae ego vidi Athenis? quae aliis in vrbibus Graeciae? quas res diuinas talibus institutas viris? quos cantus? quae carmina? prope ad immortalitatis et religionem et memoriam consecrantur. Vos tanti conseruatorem populi, tanti sceleris vltorem non modo honoribus nullis adficietis, sed etiam ad supplicium rapi patiimini? Sed, ni fallit ASCONIUS, ipse, qua perspicacia erat, TVLLIVS satis intellexit, quam debile, aut quam nullius potius momenti esset hoc argumentum, propterea quod, qui bono publico potest damnari, non ideo etiam indemnatus, praefertim*

fertim a priuato, recte occiditur. Haud quidem me fugit, quod ait MARCELLVS in l. 35. *D. de relig. Minime maiores lugendum putauerunt eum, qui ad patriam delendam, et parentes, et liberos interficiendos venerit: quem si filius patrem, aut pater filium occidisset sine scelere, etiam praemio adficiendum omnes constituerunt.* Ecquis autem non intelligit, quam diuersae sint eae species, quas MARCELLVS ante oculos habuit, ab ea, de qua nobis in praesenti sermo est. MILO sane CLODIVM non reip. causa, sed vt suo satisfaceret odio, et inimicum e medio tolleret, interfecit. Bene MARCELLVS in cit. l. 35. addit: *sine scelere.* Alia enim iusta caedes est, alia iniusta. Qui publica auctoritate, qualem habet magistratus, occidit, quando furor aliter reprimi nequit, aut iussu magistratus, vt carnifex, iuste occidit. Plane autem alia causa est priuatorum, quibus iniussis ne perniciosissimum quidem ciuem (nisi scilicet inculcata vtantur tutela, adeoque caedes necessaria sit) occidere fas est. Ipsi adeo perduelles, antequam damnentur aut puniantur, audire oportet, nisi ex huiusmodi causae cognitione principi aut reipublicae periculum immineat, vt recte monet LEYSER *Sp. 573.* Idem quidem *Sp. 574.* quo doctrina IOANNIS PARVI de caede perduellium priuatis licita vindicatur, scribit: *Ciuis ciuem perduellem et communi principi ac reipublicae exitium machinantem, quem sine magno reipublicae discrimine in iudicium trahere nequit, priuatim impune occidit.* Enimuero CLODIVS, etsi facinorosus, nequaquam tamen ea in causa erat, vt tanquam perduellis, poenae ab eo sumendae aut periculi auertendi causa, occidi a priuato iure posset. Ipse occisus CAESAR aliis pulcherrimum &), aliis

- g) CICERO in *Philipp. II. n. 25.* caedem Caesaris gloriosissimum factum dicit, et no. 117. scribit: *Haec igitur non cogitas, nec intelligis, satis esse viris fortibus didicisse, quam sit pulchrum, beneficio gratum, fama gloriosum, tyrannum occidere?* Atque haec olim communis fere fuit opinio.

aliis contra pessimum facinus videbatur, vt. refert TACITVS *Annal. I. 8.* P. CLODIVS eo tempore, quo occidebatur, praeturam petebat, multosque affeclas habebat atque amicos^{h)}. Si reapse perduellis fuisset, iure damnari poterat atque puniri, inauditus autem ac indemnatus occidi a MILONE ausu privato haud debebat. Quodsi, vt facile omnes concedent, recte scribit ALOYS. CREMANVS in *iur. crim. Tom. II. p. 178.* Si non carnifex, sed alius priuata auctoritate occidat eum, quem mori tradendum iudex pronunciauerat, occidens a poena immunis esse non debet. Neque enim solum ita impeditur, quin exemplo vnus ceteri reuocentur a criminibus, sed est etiam periculosum, armari velut singulos ciues in quemquam capitalis criminis conuictum et damnatum, ita vt, exceptis peculiaribus iis humanae vitae conditionibus, in quibus id leges expresse permittunt, nunquam sine metu poenae quis possit id sibi usurpare; quo quaeso iure ciuis ciuem, quem reipublicae perniciosum, seu vero seu falso, existimat, perimet? Hoc si liceret, perpetuo bel-

opinio. Vid. CIC. de *Off. II. 7.* NEPOS in *Timol. cap. I.* et in *Att. cap. 8.* SENECA in *Oedip. v. 243.*

Queritur peremum nemo, quem incolumem times,

idemque nonnullis placuit recentioribus. Plures, qui huc pertinent, scriptores citantur in LIPENII *Bibl. iurid.* eiusque *Suppl.* sub v. *regidium.* L. C. SCHROEDER in *elem. iur. nat. social. et gent. §. 1034.* scribit: Princeps, qui manifesto proposito in exitium reip. imperio abutitur, vocatur tyrannus. Populus itaque tyranno resistere eumque cogere potest, vt a tyrannide absteat et intra limites salutis publicae imperium reducat; in subsidium vero a pacto subiectionis recedere atque tyrannum abdicare potest, quod fit derbronisatione. Quidquid autem sit, CLODIVS non fuit tyrannus, adeoque male CICERO eius caedem cum caede tyrannorum comparat.

h) CLODIVM iisdem vitiis, quibus nocens erat, gratiosum fuisse, scribit SENECA *Ep. 97.*

bellum haberemus punitivumⁱ⁾, paucissimi- que vitae suae securi essent, sed omnes fere in perpetuo mortis viverent periculo. Sapienter quidem olim monuit PERIANDER: *Non tantum in eos, qui peccant, animadvertit, sed et illos, qui nocere iam putant, prohibe.* Sed aliud est prohibere, aliud occidere, valetque etiam hic, quod P. SYRVS ait: *Res optima est, non exstirpare sceleratos, sed scelera.*

Manet igitur, quocunque modo rem intuearis, MILONEM ob CLODII caedem nefariam, crudelem, immanem, iuste damnatum esse, poenamque scelere promeritam fuisse, CICERONEM autem malam causam diserte quidem et ingeniose, sed nullo tamen iure infaustoque successu defendisse. Neque adeo mirandum, teste ASCONIO *l. c. p. 8.* maximam partem multitudinis populi infensam fuisse, non solum MILONI, sed etiam propter invivum CICERONIS patrocini- um, quod scilicet MILONEM tanto studio defenderet.

i) De bello punitivo A. F. REINHARD in *d. Saml. Jurist. Aufsätze* P. I. p. 281.